



UKA 2019/pkt. 152
1. oktober 2019
Aqqa Samuelsen

Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisaat nr. xx, xx. xxx 2019-imeersoq.

(Inuussutissarsiornermut Nukissiuuteqarnermut Ilisimatusarnermullu Naalakkersuisoq).

Naalakkersuisut siunnersuutaat Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisissaattut siunnersuutaannut Inuit Ataqatigiit imatut oqaaseqaateqassapput:

Siullermik Inatsisartut 2018-imi ukiakkut ataatsimiinneranni siunnersuummi imm. 226-imi siunnersuuteqartut Inuit Ataqatigiit Siulittaasorisimasaat Sara Olsvig kingornalu naqqiummik iluarsineqartoq Peter Olsen, pineqartut siunnersuummik pingaarutilimmik suliaqarsimammata qutsavigerusuppakka. Inatsisartut 2018-imi ukiakkut ataatsimiinneranni siunnersuutip imm. 226 saqqummiunnerani partiit amerlanerussuteqarluartut tapersiisimasut qutsavigissallugit pinngitsoorusunngilagut.

Inuk kinaluunniit piginnaasanguani atorlugit inuiaqatigiinnut iluaqutaajumasarpoq. Naalakkersuisut suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisissaattut siunnersuummik saqqummiussaqaarmata nuannaarutigarpupput. Inuit sulerusuttut sulisinnaasullu suliffeqartariaqarput aamma inuit innarluutiluppata, angerlarsimaffeqanngitsuuppata isumaginnikkullu immikkut tapersersortariaagaluarpata. Qanorluunniit inuttut atugaqaralarutta akisussaaffimmik tunineqaraangatta nukittuallaatigisarparput eqeersaatigisarlugulu. Inuttut ineriartornermut peqataassagaanni inuttut naleqartinneqarneq, akuerisaasutut peqataatinneqartutullu misigisimanissaq pisariaqartut ilagivaat. Innuttaaqativut tapersersortariaqartut ineriartornermut peqataatinneqarlutik misigisimasariaqarput. Inuit innarluutillit, angerlarsimaffeqanngitsut isumaginnikkullu tapersersortariaqartut piginnaasamikkut naleqquttumik suliffeqarsinnaanissartik pisinnaatitaaffigisariaqarpaat. Angerlarsimaffeqanngitsut neriuuteqalersinneqartariaqarput sulinikkut angerlarsimaffeqanngitsuunerup qaangerniarneranik tapersiisutaasumik angerlarsimaffeqalersinnissaannik suliniuteqarnikkut. Naatsorsuutigilluinnarparpullu innuttaaqativut tapersersortariaqartut sulisinnaalernerimikkut imminnut akisussaaffiginerulerlutik pilersornerulersinnaanerit qulakkeerneqarsinnaasoq. Sulisartutut inuuneq nukissamik tunisisarpoq inuunerullu kajungernererusumik atornissaanut aqutissiuusseqaataasarluni.

INUIT ATAQATIGIIT

Inatsisartuni



Nunatsinni innuttaaqativut isumaginninnikkut tapersersortariaqartunut, inuunerminni timikkut eqqarsartaatsimikkullu piginnaanikinnerulersimasunut, inuit innarluutillit angerlarsimaffeqanngitsullu allatuulli pisinnaatitaaffeqarlutik suliffeqarsinnaatitaanissaannut inuttullu ineriartornermut peqataatinneqarnerunissaannut siuarsaavigineqartuarnissaat Inuit Ataqatigiit sulissutiguarumavaat. Suleqataanitsivut suleqatigiinnitsivullu akisussaaffimmik kivitseqataalluta innuttaaqativut tapersersortariaqartut pisinnaatitaaffeqarnerisa periarfissaasalu innuttaasunut innarluuteqanngitsut pisinnaatitaaffiinut sapinngisamik naligiinnerulernissaat qulakkeerinneqataaffigisariaqarparput. Nunatsinni inuit tamarmik atorfissaqartinneqarput.

Ilanngullugu Inuit Ataqatigiit nuannaarutigaaqarput inuussutissarsiortortatta nunatsinni kivitseqataarusussuseqarnermik takutitsisarnerat. Nunatsinni inuussutissarsiortortavut suliffeqarfiillu akisussaaffimmik tiguseqataanissaannut pitsaasumik naatsorsuuteqarfigaagut, taakkoqanngippammi inuit tapersersortariaqartut suliffeqarsinnaanissamut pisinnaatitaaffeqarnerat qulakkeerneqarsinnaanngimmat.

Naalakkersuisut Suliffeqarfiit innuttaasunik tapersersortarialinnik suliffissaqartitsisut nalunaarsugaasut pillugit Inatsisartut inatsisissaattut siunnersuutaat taperserparput, aappassaaneerineqannginneranilu Ataatsimiititaliamut susassaqartumut ingerlateqqillugu.